



1903–1990–2020.

10. međunarodni naučni skup

Bosanskohercegovačka država i Bošnjaci – Izazovi povijesnog trenutka

Sarajevo, 20. i 21. novembra 2020. godine

Poziv za učešće

Poštovani/a,

izuzetna nam je čast pozvati Vas da učestvujete na 10. međunarodnom naučnom skupu *Bosanskohercegovačka država i Bošnjaci – Izazovi povijesnog trenutka*, koji organizira Institut za bošnjačke studije Bošnjačke zajednice kulture „Preporod“.

Naučni skup održat će se u Sarajevu **20. i 21. novembra 2020. godine.**

Međunarodni naučni skup *Bosanskohercegovačka država i Bošnjaci*

Međunarodni naučni skup *Bosanskohercegovačka država i Bošnjaci* inicirao je 2010. godine Institut za bošnjačke studije Bošnjačke zajednice kulture „Preporod“, a prvi put održao se 2011. godine u Sarajevu. Od samog početka, naučni skup za cilj je imao bavljenje ključnim pitanjima u vezi s Bosnom i Hercegovinom i Bošnjacima iz različitih oblasti društvenih i humanističkih nauka, uključujući i interdisciplinarna istraživanja. Na prethodnih devet naučnih skupova učestvovalo je preko 150 učesnika iz Bosne i Hercegovine, domovinskih zemalja, regije i svijeta te objavljeno više od 110 radova. Radovi su objavljivani kao poseban temat unutar *Godišnjaka BZK „Preporod“*, a od narednog, 10. međunarodnog naučnog skupa *Bosanskohercegovačka država i Bošnjaci* planirano je objavljivanje zasebnog zbornika radova u izdanju Instituta za bošnjačke studije Bošnjačke zajednice kulture „Preporod“.

10. međunarodni naučni skup *Bosanskohercegovačka država i Bošnjaci – Izazovi povijesnog trenutka*

Prema nizu relevantnih pokazatelja, desetljeće u koje kročimo (2020–2030) uveliko će definirati poziciju Bosne i Hercegovine i Bošnjaka kako na domaćem, tako i na međunarodnom planu. Na domaćem planu, procesi imigracija i emigracija, s jedne, te ekonomskog rasta i razvoja i drugih posljedičnih društvenih promjena i sigurnosnih izazova, s druge strane, u velikoj mjeri definirat će kurs bosanskohercegovačke države i njenih institucija, utjecati na sudbinu bosanskohercegovačkog društva u cjelini, a posebno Bošnjaka u narednom periodu. Nadalje, procesi euro-atlantskih i drugih integracija, kao i pitanja regionalne saradnje, predstavljaju okosnicu bosanskohercegovačke vanjske politike i položaja Bosne i Hercegovine na međunarodnom planu, što se također posebno reflektira i na Bošnjake kao narod. Tu su, neizostavno, i brojna specifična unutarbosanskohercegovačka pitanja od šire društvene važnosti, odnosno pitanja položaja i odnosa Bošnjaka s drugim narodima u Bosni i Hercegovine te šire, posebno u domovinskim zemljama i dijaspori.



1903–1990–2020.

U razdoblje koje je pred nama ulazimo u stanju u kojem još nismo dostatno i na našu društvenu zbilju aplikabilno artikulirali i sistematizirali svoja znanja i, naročito, vlastite interpretacije povijesne epohe koja je prethodila našem ulasku u treći milenij. Zadržimo li se samo na novijoj historiji, Berlinski kongres iz 1878. godine jedna je od ključnih obratnica u našoj novijoj povijesti. Nakon njega, u Bosni i s Bosnom, pa tako ni s Bošnjacima, ništa više nije bilo isto. Od tog povijesnog trenutka do naše neposredne savremenosti smjenjivala su se različita razdoblja u povijesnom razvoju našeg naroda i društva, ali i bosanskohercegovačke države. Jugoslavensko iskustvo (uključujući i relativno kratko iskustvo u Kraljevini SHS) svakako je krucijalno važno u našem razumijevanju vlastite povijesne i društvene zbilje, i to u svim značajnim aspektima – identitetskom, kulturnopovijesnom, političkopovijesnom, politološkom, sociološkom i sl. Naučno utemeljena artikulacija tog iskustva, odnosno bavljenje brojnim pitanjima vezanim za ovo razdoblje u povijesti Bosne i Hercegovine i Bošnjaka, vrlo je važan preduvjet je za razumijevanje našeg *sada* i anticipiranje našeg društveno-povijesnog *sutra*. Nadalje, proglašenje nezavisnosti i, u skladu s tim, međunarodno priznanje Bosne i Hercegovine kao samostalne i suverene države 1992. godine, a onda i teško iskustvo Agresije i ratne destrukcije s vrhuncem u zločinu genocida, nezaobilazne su teme koje kao narod i društvo moramo također naučno artikulirati te poticati ozbiljnija istraživanja i ovih segmenata naše najnovije povijesti. Naposljetku, kao ključna prekretnica nadaje se i potpisivanje Daytonskog mirovnog sporazuma iz 1995. godine, kojim je okončan rat i definirana nova ustavnopravna struktura Bosne i Hercegovine. Kako ove godine obilježavamo 75 godina od završetka Drugog svjetskog rata, odnosno 25 godina od izvršenja genocida u Srebrenici, ali i 25 godina od potpisivanja Daytonskog mirovnog sporazuma, čini se važnim ovom prilikom barem dijelom sagledati ove prekretnice u našoj novijoj povijesti te njihove implikacije na naš društveni i svakovrsni razvoj i poteškoće kojima svjedočimo posljednjih četvrt stoljeća.

Uzimajući u obzir gore rečeno, **10. međunarodni naučni skup *Bosanskohercegovačka država i Bošnjaci – Izazovi povijesnog trenutka*** bit će organiziran u okvirima tri tematska panela, i to:

1. ***Bosna i Hercegovina, Bošnjaci i Jugoslavija;***
2. ***Bosna i Hercegovina 25 godina nakon Dayton;***
3. ***Genocid u Bosni i Hercegovini: Srebrenica 25 godina poslije.***

Sagledavanje ovih pitanja ključno važnih kako u povijesnom, tako i u savremenom smislu zahtijeva pristupe iz različitih oblasti društvenih i humanističkih nauka, a posebno (abecednim redom): antropologije, demografije, ekonomije, etnologije, filozofije, folkloristike, historije, kulturne historije, odnosno historije književnosti, umjetnosti i sl., kulturoloških studija, lingvistike, pedagogije, politologije, prava, psihologije, sigurnosnih studija, sociologije, umjetnosti u svim oblicima itd. Istraživanja iz svih ovih i drugih sličnih oblasti dobrodošla su u razumijevanju postavljenih tema naučnog skupa, uključujući posebno interdisciplinarna istraživanja koja se, temeljem svoje predmetne veze s Bosnom i Hercegovinom i Bošnjacima, mogu podvesti pod ime *bosanskih / bošnjačkih studija (studia bosniaca)*.



1903–1990–2020.

Prijava teme i drugi organizacijski detalji

Temu izlaganja sa sažetkom potrebno je poslati najkasnije do **20. 9. 2020. godine** na e-mail adresu Instituta za bošnjačke studije Bošnjačke zajednice kulture „Preporod“ institut@preporod.ba na uredno popunjenom prijavnom obrascu koji je u prilogu ovog poziva. Sažetak treba biti koncipiran tako da jasno identificira temu, problem, ciljeve i metodologiju rada na ne više od 300 riječi i s ne više od pet ključnih pojmova. O prihvatanju prijave učesnici naučnog skupa bit će obaviješteni najkasnije do 1. 10. 2020. godine.

Pojedinačna izlaganja na naučnom skupu mogu trajati do ukupno 20 minuta, od čega se 15 minuta odnosi na sama izlaganja, a pet minuta na diskusiju u vezi s izlaganjem.

Radni jezici naučnog skupa su bosanski i engleski.

U načelu, organizator naučnog skupa ne snosi troškove putovanja i smještaja učesnika, osim ukoliko za to budu u međuvremenu osigurana finansijska sredstva.

Organizacijski odbor

Prof. dr. Sanjin Kodrić, predsjednik Bošnjačke zajednice kulture „Preporod“

Prof. dr. Šaćir Filandra

Prof. dr. Senadin Lavić

Prof. dr. Almedina Čengić

Prof. dr. Sead Turčalo

Dr. Ahmed Kulanić

Nermin Hodžić

Sarajevo, 1. 7. 2020.